

CORFF ADNODDAU NATURIOL CYMRU

DEDDF ADNODDAU DŴR 1991

IS-DDEDDFAU GWIALEN A LLINYN AFONYDD TRAWSFFINIOL (EOGIAID A BRITHYLLOD Y MÔR) 2017

Mae Corff Adnoddau Naturiol Cymru, wrth arfer ei bwerau dan adran 210 a pharagraff 6 (1) (b), 6 (2) (b) a 6 (2) (d) o Atodlen 25 Deddf Adnoddau Dŵr 1991, yn gwneud yr is-ddeddfau canlynol.

Is-ddeddf 1 – Teitl

Gellir galw'r is-ddeddfau hyn yn Is-ddeddfau Gwialen a Llinyn Afonydd Trawsffiniol (Eogiaid a Brithyllod y Môr) 2017.

Is-ddeddf 2 – Defnydd

Caiff yr is-ddeddfau hyn eu darllen ar y cyd ag Is-ddeddfau Gwialen a Llinyn 1995, fel y'u diwygiwyd, ac Is-ddeddfau Gwialen a Llinyn Afon Gwy (Eogiaid a Brithyllod Mudol) 2011.

Bydd yr is-ddeddfau hyn yn berthnasol i afonydd trawsffiniol ac eithrio lle y nodir hynny'n unswydd.

Bydd effaith yr is-ddeddfau hyn yn dod i ben ar 31 Rhagfyr 2027.

Is-ddeddf 3 – Dehongliad

Yn yr is-ddeddfau hyn, oni bai bod y cyd-destun yn mynnu'n wahanol:

- (a) ystyr "afonydd trawsffiniol" yw'r rhannau hynny o Afon Dyfrdwy ac Afon Gwy a'u hisafonydd yng Nghymru
- (b) ystyr "Cyfoeth Naturiol Cymru" yw Corff Adnoddau Naturiol Cymru
- (c) "ystyr "eogiaid" yw eogiaid o'r rhywogaeth *Salmo salar* ac mae'n cynnwys rhan o eog
- (d) ystyr "brithyllod y môr" yw unrhyw bysgodyn o deulu'r eog a adwaenir yn gyffredinol fel brithyll neu sewin, gan gynnwys brithyllod mudol, ac mae hefyd yn cynnwys rhan o frithyll

- (e) ystyr "abwyd" yw mwydyn, corgimwch a berdysen, boed yn naturiol neu yn artiffisial
- (f) ystyr "llith pysgota artiffisial" yw unrhyw ddyfais, gan gynnwys abwydau llwy, troellblu, siglwr a phlwg, neu abwydau pysgod ffug artiffisial wedi eu gwneud o unrhyw ddefnydd a gynlluniwyd i ddenu pysgod ac sy'n cynnwys bachyn pysgota
- (g) ystyr "pryf artiffisial" yw pryf pysgota sydd wedi cael ei adeiladu'n bennaf o ddefnyddiau ffwr a phlu naturiol neu synthetig ac sydd wedi'i gynllunio i ddenu pysgod ac sy'n cynnwys bachyn pysgota
- (e) Ac eithrio fel y darperir uchod neu lle mae'r cyd-destun yn mynnu'n wahanol, bydd yr holl eiriau ac ymadroddion a ddefnyddir yn yr is-ddeddfau hyn yn cael eu diffinio gan yr ystyr a aseir iddynt gan Ddeddf Eogiaid a Physgodfeydd Dŵr Croyw 1975, Deddf Adnoddau Dŵr 1991 a Deddf yr Amgylchedd 1995 neu unrhyw addasiadau neu ailgread statudol ohonynt.

Is-ddeddf 4 – Dal a rhyddhau gyda gwialen a llinyn (eogiaid)

Bydd unrhyw unigolyn sy'n tynnu unrhyw eog byw neu farw gyda gwialen a llinyn o Afon Dyfrdwy a'i hisafonydd yng Nghymru heb awdurdod ysgrifenedig ymlaen llaw gan Cyfoeth Naturiol Cymru a ganiateir dan baragraff 6 (5A) o Atodlen 25 Deddf Adnoddau Dŵr 1991 yn euog o drosedd.

Nid yw'r is-ddeddf hon yn berthnasol i unrhyw unigolyn sy'n cymryd eog yn gyfreithiol ac yn ei ddychwelyd i'r dŵr ar unwaith gyda'r anaf lleiaf posibl.

Is-ddeddf 5 – Cyfyngiad maint (brithyllod y môr)

Caiff y paragraff canlynol ei fewnosod ar ôl Is-ddeddf 7 o Is-ddeddfau Gwialen a Llinyn 1995 (Cyfyngiadau Maint – Brithyllod (ac eithrio Brithyllod Seithliw)):

"Bydd unrhyw unigolyn sy'n cymryd unrhyw frithyll y môr byw neu farw sydd o faint sy'n fwy na 60 centimetr gyda gwialen a llinyn o Afon Dyfrdwy a'i hisafonydd yng Nghymru yn euog o drosedd.

Caiff y maint ei ganfod trwy fesur o flaen y trwyn i ddiwedd y gynffon.

Nid yw'r is-ddeddf hon yn berthnasol i unrhyw unigolyn sy'n cymryd unrhyw frithyll y môr byw neu farw o faint sydd yn fwy na 60 centimetr ac yn ei ddychwelyd i'r dŵr ar unwaith gyda'r anaf lleiaf posibl."

Is-ddeddf 6 – Dim pysgota ag abwyd

- (1) Ar ôl paragraff (a) o Is-ddeddf 2 Is-ddeddfau Gwialen a Llinyn 1995 (Dehongliad), caiff y canlynol ei fewnosod:

"(ab) ystyr 'afonydd trawsffiniol' yw'r rhannau hynny o Afon Dyfrdwy ac Afon Gwy a'u hisafonydd yng Nghymru."

- (2) Ar ôl paragraff (a) (2) o Is-ddeddf 9 Is-ddeddfau Gwialen a Llinyn 1995 (Defnyddio Llithiau ac Abwyd gyda Gwialen a Llinyn) (Eogiaid a Brithyllod y Môr), caiff y canlynol ei fewnosod:

"(2A) Ni fydd unrhyw unigolyn yn pysgota am, yn cymryd, neu'n ceisio pysgota am neu gymryd unrhyw eog o'r afonydd trawsffiniol gyda gwialen a llinyn trwy ddefnyddio unrhyw abwyd.

(2B) Ni fydd unrhyw unigolyn cyn 1 Mai yn pysgota am, yn cymryd, neu'n ceisio pysgota am neu gymryd unrhyw frithyll y môr o'r afonydd trawsffiniol gyda gwialen a llinyn trwy ddefnyddio unrhyw abwyd."

Is-ddeddf 7 – Bachau

Ar ôl paragraff (a) (1) o Is-ddeddf 10 Is-ddeddfau Gwialen a Llinyn 1995 (Bachau a Bachu Pysgod) (Bachau heb adfach neu fachau lle y tynnwyd adfachau), caiff y canlynol ei fewnosod:

"(1A) Ni fydd unrhyw unigolyn yn pysgota am, yn cymryd, neu yn ceisio pysgota am neu gymryd unrhyw eog neu frithyll y môr o'r afonydd trawsffiniol gyda gwialen a llinyn ac eithrio gyda bachau heb adfachau neu lle y tynnwyd adfachau."

Ar ôl paragraff (aa) (1) o Is-ddeddf 10 Is-ddeddfau Gwialen a Llinyn 1995 (Bachau a Bachu Pysgod) (bachau unigol), caiff y canlynol ei fewnosod:

"(2) Ni fydd unrhyw unigolyn yn pysgota am, yn cymryd, neu'n ceisio pysgota am neu

gymryd unrhyw frithyll y môr o'r afonydd trawsffiniol gyda gwialen a llinyn yn defnyddio unrhyw abwyd ac eithrio un mwydyn wedi ei roi ar fachyn unigol heb adfach neu lle y tynnwyd adfach a lle y rhoddir cyfyngiad o 8 milimetr neu lai ar agoriad bachyn o'r fath wedi ei fesur o'r goes i'r pwynt."

Ar ôl paragraff (c) (1) o Is-ddeddf 10 Is-ddeddfau Gwialen a Llinyn 1995 (Bachau a Bachu Pysgod) (Bachau Triphlyg), caiff y canlynol ei fewnosod:

"(2) Ni fydd unrhyw unigolyn yn pysgota am, yn cymryd, neu yn ceisio pysgota am neu gymryd unrhyw eog neu frithyll y môr o'r afonydd trawsffiniol gyda gwialen a llinyn yn defnyddio abwyd neu lith pysgota artiffisial neu bryf artiffisial sydd ag un neu fwy o fachau triphlyg."

Is-ddeddf 8 – Diddymu is-ddeddfau presennol

(1) Bydd diddymiad is-ddeddfau presennol a amlinellir yn Atodlen 1 yn dod i rym.

ATODLEN 1

Diddymu Is-ddeddfau Presennol

Rhif yr is-ddeddf	Dyddiad cadarnhau
Is-ddeddfau Gwialen a Llinyn 1995 (Defnyddio Llithiau ac Abwyd gyda Gwialen a Llinyn) (Eogiaid a Brithyllod y Môr) Is-ddeddf 9 (a) (3) (ii)	Yn rhannol ar 29 Gorffennaf 1995 ac yn rhannol ar 1 Medi 1994

FEL TYSTIOLAETH O HYN CAFODD SÊL GYFFREDIN

CORFF ADNODDAU NATURIOL CYMRU

ei hychwanegu yma ar y

8fed

dydd o fis Tachwedd 2017

S. Abrey

LLOFNODWR AWDURDODEDIG

